

საქართველოს კანონი

„თამბაქოს კონტროლის შესახებ“ საქართველოს კანონში

ცვლილების შეტანის თაობაზე

მუხლი 1. საქართველოს კანონში „თამბაქოს კონტროლის შესახებ“ (საქართველოს საკანონმდებლო მაცნე №76,29.12.2010) შეტანილ იქნეს შემდეგი ცვლილება:

1. მე-2 მუხლის:

ა) „ე“ ქვეპუნქტი ამოღებულ იქნეს;

ბ) „მ“ ქვეპუნქტის შემდეგ დაემატოს შემდეგი შინაარსის „ნ“ - „პ“ ქვეპუნქტები:

„ნ) ჯანდაცვითი გადაწყვეტილებების მომზადების, მიღებისა და დანერგვის პროცესში თამბაქოს ინდუსტრიის მონაწილეობისა და ინტერესების დაუშვებლობას და თამბაქოს ინდუსტრიასთან საჯარო ორგანიზაციების/პირების ურთიერთობათა გამჭვირვალებას და პასუხისმგებლობას;

ო) თამბაქოს ნაწარმის ინგრედიენტების, გამოფრქვეული ნივთიერებების და შეფუთვის კონტროლს;

პ) თამბაქოს მწარმოებელთა და რეალიზატორთა პასუხისმგებლობას – ანაზღაურონ ჯანმრთელობისა და გარემოსთვის თამბაქოს წარმოებით და მოხმარებით მიყენებული ზარალი;

ჟ) კანონით დაშვებული სხვა ღონისძიებების განხორციელება ამ კანონის მიზნების და თამბაქოს კონტროლის ჩარჩო კონვენციის ამოცანების და პრინციპების შესრულებისათვის.“.

2. მე-3 მუხლის:

ა) „ა“ ქვეპუნქტი ჩამოყალიბდეს შემდეგი რედაქციით:

„ა) თამბაქოს ნაწარმი – თამბაქოს ან მისი ელემენტების შემცველი ნებისმიერი ნაწარმი, გარდა ნიკოტინის შემცველი სამკურნალო საშუალებებისა, რომლებიც განკუთვნილია მოსაწევად, დასაღეჭად საწუწნად ან შესასუნთქად, მათ შორის:

ა.ა) ფილტრიანი და უფილტრო სიგარეტები;

ა.ბ) პაპიროსები, სიგარები და სიგარილები;

ა.გ) საჩიბუხე და ჩილიმისთვის განკუთვნილი თამბაქო;

ა.დ) შესახვევი თუთუნი;

ა.ე) დასაღეჭი, საწუწნი და შესასუნთქი თამბაქო.“;

ა.ვ) ელექტრონული სიგარეტებისა და სხვა მსგავსი მოწყობილობების ნიკოტინის შემცველი მასალები/კარტრიჯები/კაფსულები.“;

ბ) „ა“ ქვეპუნქტის შემდეგ დაემატოს შემდეგი შინაარსის „ა¹“ და „ა²“ ქვეპუნქტები:

„ა¹) „თამბაქოს აქსესუარი და მოხმარებისათვის განკუთვნილი მოწყობილობა – მუნდშტუკი, ჩიბუხი, ჩილიმი, შესასუნთქი ან საწუწნი თამბაქოს მოწყობილობები, ელექტრონული სიგარეტები და სხვა მსგავსი მოწყობილობები, სიგარეტის ასანთები სპეციალური სანთებელები, თამბაქოს გასახვევი ქაღალდი, თამბაქოს შესახვევი ან დასაჭრელი აპარატი, საფერფლე, ნებისმიერი სახის პორტსიგარა ან სხვა საგნები, რომლებიც განკუთვნილია

უპირატესად თამბაქოს მოხმარებისათვის ან შენახვისათვის, აგრეთვე სიგარეტის, მისი კოლოფის და ზემოაღნიშნული საგნების ილუსტრაციები ან გამომსახველი სხვა საგნები;

ა²) თამბაქოს ახალი სახის ნაწარმი - თამბაქოს ნაწარმი, რომელიც განთავსებული არაა საქართველოს ბაზარზე 2016 წლის 1 დეკემბრის მდგომარეობით ან არ მიეკუთვნება ამ მუხლის „ა“ ქვეპუნქტში მითითებულ სახეობებს.“;

ბ) „დ“ ქვეპუნქტი ჩამოყალიბდეს შემდეგი რედაქციით:

„დ) თამბაქოს მოწევა - თამბაქოს ნაწარმის წვის ან გახურების შედეგად გამოყოფილი კვამლის შესუნთქვა“;

ღ) „ვ“ ქვეპუნქტი ჩამოყალიბდეს შემდეგი რედაქციით:

„ვ) სამედიცინო გაფრთხილება - თამბაქოს მოწევის მავნებლობის შესახებ გამაფრთხილებელი წარწერა, რომელიც უნდა მოიცავდეს შესაბამის პიქტოგრამას“;

ე) „თ“ ქვეპუნქტი ჩამოყალიბდეს შემდეგი რედაქციით:

„თ) თამბაქოს ნაწარმის ინგრედიენტები - თამბაქოს ნაწარმის შემადგენლობაში მყოფი თამბაქო, დანამატი, აგრეთვე ნებისმიერი ნივთიერება ან ელემენტი ქადალდის, ფილტრის, კაფსულის, მელნის და წებოს ჩათვლით.“;

ვ) „თ“ ქვეპუნქტის შემდეგ დაემატოს შემდეგი შინაარსის „თ¹“ ქვეპუნქტი:

„თ¹) დანამატი - ნებისმიერი ნივთიერება ან მასალა, გარდა თამბაქოს ფოთლისა, რომელიც ემატება თამბაქოს ნაწარმს“;

ზ) „კ“ ქვეპუნქტი ჩამოყალიბდეს შემდეგი რედაქციით:

„კ) თამბაქოს ნაწარმისგან გამოფრქვეული ნივთიერებები - ნივთიერებები, რომლებიც გამოიყოფა თამბაქოს ნაწარმის დანიშნულებისამებრ მოხმარების შედეგად, როგორცაა სიგარეტის ან სხვა სახის მოსაწევი თამბაქოს კვამლში შემავალი ნივთიერებები გამოყოფილი მოსაწევი თამბაქოს მოხმარების შედეგად, აგრეთვე საღეჭი, საწუწნი, შესასუნთქი თამბაქოს მოხმარების შედეგად გამოყოფილი ნივთიერებები“;

თ) „ლ“ ქვეპუნქტი ამოღებულ იქნეს;

ი) „წ“ ქვეპუნქტი ამოღებულ იქნეს;

კ) „ს“ ქვეპუნქტი ამოღებულ იქნეს;

ლ) დაემატოს შემდეგი შინაარსის „ფ“ და „ქ“ ქვეპუნქტები:

„ფ) შენობა-ნაგებობა - ამ კანონის მიზნებისათვის, შენობა-ნაგებობას წარმოადგენს ნებისმიერი კონსტრუქცია, გარდა სატრანსპორტო საშუალებებისა, რომელსაც გააჩნია ნებისმიერი სახის სახურავი ან ჭერი, ან იატაკის და სახურავის/ჭერის გარდა სხვა ზედაპირის მინიმუმ 1/2-ზე გააჩნია ნებისმიერი სახის კედლები (ღია ან დახურული ფანჯრის და კარების ჩათვლით);

ქ) საზოგადოებრივი ტრანსპორტი - ნებისმიერი ტრანსპორტი, რომელიც გამოიყენება საზოგადოების წევრთა გადასაყვანად, ჩვეულებრივ საფასურის ან კომერციული მოგების მიზნით, ტაქსების ჩათვლით.“.

3. მე-4 მუხლი ჩამოყალიბდეს შემდეგი რედაქციით:

„მუხლი 4. თამბაქოს კონტროლის ღონისძიებები და კანონქვემდებარე ნორმატიული აქტები

1. საქართველოს მთავრობა ახორციელებს თამბაქოს კონტროლის გრძელვადიან სახელმწიფო სტრატეგიას და ყოველწლიურ სახელმწიფო პროგრამას.

2. საქართველოს მთავრობის ნორმატიული აქტით განისაზღვრება ჯანდაცვითი გადაწყვეტილებების მომზადების, მიღებისა და დანერგვის პროცესში თამბაქოს ინდუსტრიის და მასთან პირდაპირი თუ არაპირდაპირი სახით დაკავშირებული არასამთავრობო და კერძო

სექტორის ორგანიზაციების მონაწილეობის და მათი ინტერესების დაუშვებლობის რეგულირების საკითხი.

3. საქართველოს მთავრობის აქტით განისაზღვრება:

ა) საქართველოში სარეალიზაციოდ განკუთვნილი თამბაქოს ნაწარმის ინგრედიენტების და გამოფრქვეული ნივთიერებების ზღვრულად დასაშვები ნორმები, გაზომვისა და რეგულირების წესები, თამბაქოს კონტროლის სფეროში მოქმედი საერთაშორისო მოთხოვნების გათვალისწინებით;

ბ) თამბაქოს ნაწარმზე (კოლოფზე/ბლოკზე, შეფუთვაზე) სამედიცინო გაფრთხილებების და პიქტოგრამების დატანის წესი.

4. თამბაქოს ნაწარმის გამოფრქვეული ნივთიერებების გაზომვა უნდა უზრუნველყოს თამბაქოს ნაწარმის მწარმოებელმა ან/და იმპორტიორმა საკუთარი ხარჯებით. თამბაქოს ნაწარმის მწარმოებელმა ან/და იმპორტიორმა უნდა დაადასტუროს გაზომვის სტანდარტების შესაბამისად ჩატარება და საქართველოს შრომის, ჯანმრთელობისა და სოციალური დაცვის სამინისტროს ყოველი წლის 31 მაისამდე უნდა წარუდგინოს სრული დოკუმენტაცია ამ საკითხის შესახებ. თამბაქოს მწარმოებელი ან/და იმპორტიორი უზრუნველყოფენ თამბაქოს ნაწარმის შესაბამისობას ამ დოკუმენტაციაში მითითებულ მონაცემებთან.

5. ამ კანონით განსაზღვრული თამბაქოს მოხმარების, წარმოების, იმპორტის და რეალიზაციის აკრძალვის/შეზღუდვის წესები გათვალისწინებულ უნდა იქნეს დაწესებულებათა სალიცენზიო, სანებართვო და საავტორიზაციო პირობებში.

6. ამ კანონით გათვალისწინებული თამბაქოს კონტროლი არ წარმოადგენს სამეწარმეო საქმიანობის კონტროლს და შესაბამისად, მასზე არ ვრცელდება „სამეწარმეო საქმიანობის კონტროლის შესახებ“ საქართველოს კანონის მოქმედება.“.

4. მე-5 მუხლის:

ა) სათაური ჩამოყალიბდეს შემდეგი რედაქციით:

„მუხლი 5. თამბაქოს ნაწარმის, მისი აქსესუარების და მოხმარებისთვის განკუთვნილი მოწყობილობების რეალიზაცია და განლაგება“;

ბ) მე-2 პუნქტი ჩამოყალიბდეს შემდეგი რედაქციით:

„2. აკრძალულია თამბაქოს ნაწარმის, მისი აქსესუარების და მოხმარებისთვის განკუთვნილი მოწყობილობების რეალიზაცია და განლაგება:

ა) სააღმზრდელო, საგანმანათლებლო და საგანმანათლებლო-სააღმზრდელო დაწესებულებებში და მათ მიმდებარე ტერიტორიებზე 100 მეტრის რადიუსში (დაწესებულების ტერიტორიის უახლოესი წერტილიდან);

ბ) ყველა სახის სამედიცინო, სასწავლო, სახელმწიფო, სპორტულ და კულტურულ დაწესებულებაში და მათ კუთვნილ ტერიტორიაზე;

გ) განლაგება სავაჭრო ობიექტების იმ სექციებში, სადაც ბავშვთა ტანსაცმელი, კვების პროდუქტები და სათამაშოები იყიდება;

დ) განლაგება ვიტრინებზე, ვიტრაჟებზე, დახლზე, თაროზე ან ნებისმიერი სხვა სახით იმგვარად, რომ იგი ხილვადია ობიექტის შიგნიდან ან გარედან;

ე) თამბაქოს ნაწარმის ან მისი აქსესუარების რეალიზაცია იმგვარად, რომ ობიექტიდან მისი მიწოდება ხდება უშუალოდ ტრანსპორტში მსხდომთათვის;

ვ) ერთეული ღერებით, ერთეული შეფუთვით (კოლოფით), თუ მასში 20 ღერ სიგარეტზე ნაკლებია ან მეტია;

ზ) შეფუთვის გარეშე;

თ) 18 წლამდე პირებზე;

ი) ელექტრონული ან მექანიკური მანქანის საშუალებით, აგრეთვე იმგვარად, რომ უშუალოდ მიუწვდებოდეს ხელი მომხმარებელს;

კ) ინტერნეტით ან ფოსტით (საცალო ვაჭრობა);

ლ) თუ საქართველოში სარეალიზაციოდ განკუთვნილი თამბაქოს ნაწარმი დამზადებულია საქართველოს კანონმდებლობის დარღვევით;

მ) უფასოდ ან თვითღირებულებაზე დაბალ ფასად, მათ შორის, სამხედრო მოსამსახურეების სადღეღამისო ულუფაში შეტანით.“;

გ) მე-2 პუნქტს დაემატოს შემდეგი შინაარსის „2“ პუნქტი:

„2¹ აკრძალულია თამბაქოს ახალი სახის ნაწარმის რეალიზაცია საქართველოში.“;

დ) მე-3-5 პუნქტები ჩამოყალიბდეს შემდეგი რედაქციით:

„3. აკრძალულია თამბაქოს ნაწარმის, მისი აქსესუარების და მოხმარებისთვის განკუთვნილი მოწყობილობების გათამაშების, ლატარიების, აზარტული და მომგებიანი თამაშობების საშუალებით დარიგება ან გათამაშება ან/და ამგვარ ღონისძიებებში თამბაქოს ნაწარმის, მისი რომელიმე ნაწილის საშუალებით, ან მისი განაწილებით მონაწილეობა. ასევე ყველა სხვა სახით თამბაქოს ნაწარმის პოპულარიზაცია, მათ შორის:

ა) საჩუქრების გაცემა ან შეთავაზება თამბაქოს ნაწარმის რეალიზაციის, გადაცემის ან გასინჯვის მიზნით.

ბ) ინიციატივის განმტკიცება ან ერთგულების სქემები, როგორცაა კუპონების დარიგება თამბაქოს ნაწარმის გაყიდვისას.

გ) პირდაპირი პერსონალური კომუნიკაციები, ქსელური მარკეტინგი, რომელიც ახდენს ან შესაძლოა მოახდინოს თამბაქოს ნაწარმის, ან თამბაქოს მწარმოებლის ან საბითუმო მოვაჭრის პოპულარიზაცია.

დ) ინდივიდებზე გამიზნული საპოპულარიზაციო მასალები, მათ შორის საინფორმაციო მასალები, როგორცაა პირდაპირი გზავნილი, ტელემარკეტინგი, მომხმარებელთა კვლევა რომელიც ახდენს ან შეიძლება მოახდინოს თამბაქოს ნაწარმის, ან თამბაქოს მწარმოებლის ან საბითუმო მოვაჭრის პოპულარიზაცია.

ე) თანხის გადახდა, ჯილდო ან სხვაგვარი წვლილის შეტანა საცალო მოვაჭრის საქმიანობაში, რომელიც გამიზნულია მათი მოტივირებისთვის გაყიდონ მეტი თამბაქოს ნაწარმი რომელიც გამიზნულია მათი მოტივირებისთვის

ვ) თამბაქოს მწარმოებლის, იმპორტიორის ან საბითუმო მოვაჭრის, მათთან პირდაპირ ან არაპირდაპირ დაკავშირებული პირების მიერ თანხის გადახდა ან სხვაგვარი წვლილის შეტანა ღონისძიებაში, ინდივიდუალური პირის ან ორგანიზაციის საქმიანობაში, რომელიც შედეგად ახდენს ან შესაძლოა მოახდინოს თამბაქოს ნაწარმის, მწარმოებლის, იმპორტიორის ან საბითუმო მოვაჭრის ან მათი წარმომადგენლის პოპულარიზაცია.

ზ) ისეთი სათამაშოების, ტკბილეულის ან სხვა არათამბაქოს ნაწარმის გაყიდვა ან დარიგება რომელიც წარმოადგენს თამბაქოს ნაწარმის ან მისი მოხმარების ილუსტრაციას, სიმულაციას ან იმიტირებას.

4. თამბაქოს ნაწარმის რეალიზაციის ადგილებში უნდა განთავსდეს კანონმდებლობით დამტკიცებული სამედიცინო გაფრთხილება და თამბაქოზე უარის თქმის მსურველთათვის საკონტაქტო ტელეფონის ნომერი კონსულტაციის მისაღებად, აგრეთვე ინფორმაცია იმის შესახებ, რომ არასრულწლოვნებზე თამბაქოს ნაწარმის გაყიდვა აკრძალულია. ასეთი სამედიცინო გაფრთხილება უნდა განთავსდეს არანაკლებ A4 ფორმატის ქაღალდზე.“.

5. თუკი თამბაქოს ნაწარმის რეალიზატორი ვერ ადასტურებს, რომ თამბაქოს ნაწარმის მყიდველი პირი სრულწლოვანია, იგი ვალდებულია და უფლებამოსილია პირს მოსთხოვოს

მისი სრულწლოვანების დამადასტურებელი დოკუმენტი და მხოლოდ სრულწლოვანებაში დარწმუნების შემდეგ მიჰყიდოს მას თამბაქოს ნაწარმი.“.

5. მე-6 მუხლის:

ა) პირველი პუნქტი ჩამოყალიბდეს შემდეგი რედაქციით:

„1. საქართველოში სარეალიზაციოდ განკუთვნილი თამბაქოს ნაწარმის დასახელება, მისი შეფუთვის ან/და ეტიკეტის რომელიმე ელემენტი არ უნდა შეიცავდეს რაიმე ყალბ, შეცდომაში შემყვან ან არასწორი წარმოდგენის შემქმნელ ინფორმაციას თამბაქოს ნაწარმის თვისებების, მავნე ზემოქმედების ან გამოფრქვეული მავნე ნივთიერებების შესახებ, ასევე არ შეიძლება გამოყენებული იქნეს საქართველოს სახელმწიფო ან/და რომელიმე უცხოურ ენაზე რაიმე ისეთი სიტყვა, სავაჭრო ნიშანი, ამხსნელი სიტყვა, აბრევიატურა ან გამოსახულება, გრაფიკი, ციფრი, ფერი, ნიშანი, რომელიც პირდაპირი ან არაპირდაპირი გზით შექმნის არასწორ წარმოდგენას თამბაქოს ნაწარმის ნაკლებ მავნელობაზე სხვა ნაწარმთან შედარებით, მათ შორის მათი გამოყენება ბრენდის ან სავაჭრო ნიშნის დასახელებაში. ზოგიერთი ასეთი სიტყვაა: „მსუბუქი“, „რბილი“, „ნაკლებად მძაფრი“, „ულტრამსუბუქი“, „დაბალი შემცველობით“, „ექსტრა“, „ულტრა“, „მენტოლი“.“;

ბ) მე-2 და მე-3 პუნქტები ჩამოყალიბდეს შემდეგი რედაქციით:

„2. თამბაქოს ნაწარმის თითოეულ კოლოფსა/შეფუთვისა და ბლოკზე განთავსებული უნდა იყოს კანონმდებლობით დამტკიცებული სამედიცინო გაფრთხილება, რომელიც უნდა მოიცავდეს ძირითად გაფრთხილებას, დამატებით გაფრთხილებას და საკონტაქტო ტელეფონის ნომერს.

3. საქართველოს მთავრობა ამტკიცებს ძირითადი სამედიცინო გაფრთხილების 3 ნიმუშს, დამატებითი სამედიცინო გაფრთხილების 9 ნიმუშს და შესაბამისი პიქტოგრამის 9 ნიმუშს, საკონტაქტო ტელეფონის ნომერს, აგრეთვე სამედიცინო გაფრთხილებებისა და თამბაქოს ნაწარმის მოხმარების შედეგად გამოფრქვეული ნივთიერებების შესახებ წარწერის კომპიუტერულ შრიფტსა და ზომას, გამოსახულების ხარისხის შესაბამის პარამეტრებს.“;

გ) მე-2 პუნქტს დაემატოს შემდეგი შინაარსის 2¹ პუნქტი:

„2¹. სამედიცინო გაფრთხილება უნდა მოიცავდეს კანონმდებლობით დადგენილი წესით დამტკიცებულ დამატებითი გაფრთხილების შესაბამის პიქტოგრამას.“;

დ) მე-4 და მე-5 პუნქტები ჩამოყალიბდეს შემდეგი რედაქციით:

„4. პიქტოგრამის ნიმუში უნდა შეესაბამებოდეს და შეიცავდეს დამატებითი სამედიცინო გაფრთხილების ტექსტს და უნდა იკავებდეს სამედიცინო გაფრთხილების სრულ მოცულობას.

5. სამედიცინო გაფრთხილებები ექვემდებარება როტაციას შემდეგი სახით:

ა) თამბაქოს ნაწარმის მწარმოებელმა ან/და იმპორტიორმა წლის განმავლობაში ყველა ძირითადი სამედიცინო გაფრთხილება უნდა გამოიყენოს იმგვარად, რომ ისინი თანაბრად განაწილდეს გასაყიდი თამბაქოს ნაწარმის ყოველი სახეობის კოლოფებსა/შეფუთვისა და ბლოკებზე;

ბ) თამბაქოს ნაწარმის მწარმოებელმა ან/და იმპორტიორმა წლის განმავლობაში უნდა აირჩიოს 3 დამატებითი სამედიცინო გაფრთხილება, შესაბამისი პიქტოგრამებით, იმგვარად, რომ

ისინი თანაბრად განაწილდეს გასაყიდი თამბაქოს ნაწარმის ყოველი სახეობის კოლოფებსა/შეფუთვებსა და ბლოკებზე.“;

ე) მე-6 მუხლის მე-6 პუნქტი ჩამოყალიბდეს შემდეგი რედაქციით:

„6. თამბაქოს ნაწარმის ყოველ შეფუთვაზე სამედიცინო გაფრთხილება განთავსებული უნდა იყოს საქართველოს სახელმწიფო ენაზე (ხოლო აფხაზეთის ავტონომიურ რესპუბლიკაში – აგრეთვე აფხაზურად), ამ მუხლის მე-2 და 2¹ პუნქტების შესაბამისად, და უნდა იყოს:

ა) დაწერილი გარკვევით და მკაფიოდ;

ბ) დაბეჭდილი შეფუთვაზე, გარდა გარე გამჭვირვალე შეფუთვისა, არ უნდა იყოს დაფარული, დამახინჯებული ან შეცვლილი და თამბაქოს ნაწარმის შეფუთვის გახსნისას არ უნდა დაზიანდეს ან არ უნდა მოსცილდეს მას;

გ) დაბეჭდილი კომპიუტერული შრიფტით, გამუქებულად, თეთრ ფონზე შავი ასოებით ან შავ ფონზე თეთრი ასოებით; თეთრი ფონი შემოფარგლული უნდა იყოს შავი ჩარჩოთი, ხოლო შავი ფონი – თეთრი ჩარჩოთი, რომელიც არ კვეთს და არ ეხება ასოებს; ჩარჩოს ხაზის სისქე არ უნდა იყოს 3 მმ-ზე ნაკლები და 4 მმ-ზე მეტი;

დ) განთავსებული შეფუთვის წინა და უკანა გვერდებზე, ზედა და ქვედა კიდეების პარალელურად, და არ უნდა იკავებდეს უკანა გვერდის საერთო ფართობის 65 პროცენტზე ნაკლებს და წინა გვერდის 65 პროცენტზე ნაკლებს, რომლებშიც არ შედის შემომფარგვლელი ხაზები.

ე) დამატებითი გაფრთხილება განთავსდეს კოლოფის წინა გვერდზე, ხოლო ძირითადი გაფრთხილება უკანა გვერდზე.“.

6. მე-7 მუხლის მე-3 პუნქტი ამოღებული იქნეს.

7. მე-8 მუხლი ჩამოყალიბდეს შემდეგი რედაქციით:

„მუხლი 8. დამხმარე საგნების გამოყენება

საქართველოს კანონმდებლობის შესაბამისად აკრძალულია დამხმარე საგნების გამოყენება, მანიპულირება, ტრანსპორტირება ან რეალიზაცია, თუ არსებობს ამ საგნებიდან თამბაქოში, მათ ზედაპირზე, თამბაქოს მოხმარებისას გამოყოფილ კვამლში ან სხვა პროდუქტებში დამატებით საშიში ნივთიერებების გადასვლის საფრთხე.“.

8. მე-9 მუხლი ჩამოყალიბდეს შემდეგი რედაქციით:

„მუხლი 9. თამბაქოს ექსპორტი და იმპორტი

თამბაქოს ექსპორტი და იმპორტი ხორციელდება საქართველოს კანონმდებლობის შესაბამისად.“.

9. მე-10 მუხლის:

ა) პირველი პუნქტი ჩამოყალიბდეს შემდეგი რედაქციით:

„1. თამბაქოს მოწევა აკრძალულია:

ა) ნებისმიერი დანიშნულების შენობა-ნაგებობაში, გარდა კერძო საცხოვრებელი სახლებისა, თამბაქოს კვამლის შემსწავლელი სპეციალიზირებული ლაბორატორიული დანადგარებისა, აგრეთვე პატიმრობის და თავისუფლების აღკვეთის დაწესებულებებისა.

ბ) საზოგადოებრივ ტრანსპორტში, მათ შორის, ავტობუსში, სამარშრუტო ტაქსიში, არასამარშრუტო ტაქსიში, საჰაერო ხომალდში, მეტროპოლიტენში, მატარებელში, ტრამვაისა და ტროლეიბუსში, გემზე, კატერებსა და სხვა სახალხო საშუალებებზე;

გ) საადმირდელო, საგანმანათლებლო და საგანმანათლებლო საადმირდელო, ნებისმიერი სხვა სასწავლო დაწესებულების, აგრეთვე ბიბლიოთეკების, მოსწავლე ახალგაზრდობის ბანაკების, ბავშვთა გასართობი ცენტრების და 18 წლამდე პირებისთვის განკუთვნილი სხვა დაწესებულებების შენობა-ნაგებობებში და ტერიტორიაზე, აგრეთვე 18 წლამდე პირებისთვის განკუთვნილ საზოგადოებრივ შეკრებებზე.

დ) სამედიცინო და ფარმაცევტულ დაწესებულებათა შენობა-ნაგებობებში და ტერიტორიაზე, გარდა სტაციონარული ფსიქიატრიული და პალიატიური მკურნალობისთვის განკუთვნილი დაწესებულებების ხელმძღვანელების მიერ განსაკუთრებულ შემთხვევებში გამოცემული სპეციალური ბრძანებით ზოგიერთი ქმედუნარო ან მძიმე ავადმყოფი პაციენტისათვის განსაზღვრული ადგილისა (ადგილებისა), რომელიც უნდა იყოს სრულად (კედლებით) გამიჯნული უნდა იყოს დაწესებულების სხვა ნაწილებისაგან/ტერიტორიისაგან, ჰქონდეს ვენტილაცია ან ღია სივრცეში გამავალი ფანჯარა.

ე) ბენზინგასამართი, გაზგასამართი და გაზგამანაწილებელი სადგურების, აგრეთვე იმ დაწესებულებათა შენობა-ნაგებობებში და ტერიტორიაზე, სადაც ინახება ცეცხლსაშიში ნივთიერებები;

ვ) სტადიონებზე.

ბ) პირველი პუნქტის შემდეგ დაემატოს შემდეგი შინაარსის 1¹ პუნქტი:

„1¹. პატიმრობის და თავისუფლების აღკვეთის დაწესებულებებში თამბაქოს მოხმარების წესსა და პირობებს განსაზღვრავს საქართველოს სასჯელაღსრულებისა და პრობაციის სამინისტრო.“;

გ) მე-2 და მე-3 პუნქტები ამოღებულ იქნეს;

დ) მე-5 და მე-6 პუნქტები ამოღებულ იქნეს;

ე) მე-7 პუნქტი ჩამოყალიბდეს შემდეგი რედაქციით:

„7. აკრძალულია თამბაქოს მოწევის ან მოხმარების სხვა ფორმების დემონსტრირება მასობრივი ინფორმაციის საშუალებით, სხვა ბეჭდური ან ელექტრონული საშუალებით, მასობრივი ჩვენებისა და თეატრალური წარმოდგენის მეშვეობით, თუ ეს არ არის ღია სივრცეში პირდაპირი ეთერის მიმდინარეობისას კადრში მწვევლის შემთხვევითი მოხვედრა. ეს აკრძალვა არ ეხება თამბაქოს მოწევის ან მოხმარების გამოსახვას, თუკი ეს გამოსახვა ეფუძნება კანონიერ შემოქმედებით გამოხატვას და არ მომხდარა თამბაქოს მწარმოებლის, იმპორტიორის, მოვაჭრის ან მათი წარმომადგენლის, მათთან პირდაპირი ან არაპირდაპირი გზით დაკავშირებული იურიდიული თუ ფიზიკური პირის მიერ თამბაქოს მოწევის ან მოხმარების გამოსახვის სანაცვლოდ თანხის გამიზნული გადახდა ან სხვა წვლილის შეტანა ან მისი დაპირება.“.

ზ) მე-8 პუნქტი ჩამოყალიბდეს შემდეგი რედაქციით:

„8. დაწესებულებათა ხელმძღვანელები/მფლობელები პასუხისმგებელი არიან:

ა) მათ კომპეტენციას მიკუთვნებულ დაწესებულებებში ამ კანონით განსაზღვრული მოწვევის აკრძალვის/შეზღუდვის უზრუნველყოფაზე;

ბ) შეიმუშაონ და დაამტკიცონ თამბაქოს მოწვევასთან დაკავშირებით შესაბამის დაწესებულებაში მოქმედი წესები ამ კანონის მოთხოვნათა შესაბამისად;

გ) თამბაქოს მოწვევასთან დაკავშირებით შესაბამის დაწესებულებაში მოქმედი წესების შესახებ მასალა და მოწვევის აკრძალვის წარწერა და ნიშანი განათავსონ დაწესებულების ტერიტორიაზე და შენობების ყველა შესასვლელში და სხვა თვალსაჩინო ადგილებში;

დ) არ დაუშვას, ხოლო დარღვევის შემთხვევაში, კანონით მინიჭებული უფლებამოსილების ფარგლებში, დაუყოვნებლივ აღკვეთოს დაწესებულებაში თამბაქოს მოხმარება იმ ადგილებში სადაც კანონით მოწვევა აკრძალულია.”

თ) მე-8 პუნქტის შემდეგ დაემატოს შემდეგი შინაარსის მე-9 პუნქტი:

„9. თუ ამ მუხლის პირველი პუნქტის „დ“ ქვეპუნქტით გათვალისწინებული პაციენტი სტაციონარული ფსიქიატრიული და პალიატიური მკურნალობისათვის განკუთვნილ დაწესებულებაში იზოლირებულია სხვა პაციენტებისაგან და მისი გადაადგილება შეუძლებელია, დაშვებულია მის მიერ თამბაქოს პალატაში მოწვევა შესაბამისი დაწესებულების ხელმძღვანელის სპეციალური ინდივიდუალური ბრძანებით გაცემული ნებართვით.“.

10. კანონის მე-12 მუხლი ჩამოყალიბდეს შემდეგი რედაქციით:

„მუხლი 12. კანონის შესრულების სახელმწიფო კონტროლი

1. ამ კანონის შესრულების სახელმწიფო კონტროლი ხორციელდება საქართველოს კანონმდებლობის შესაბამისად.

2. ამ კანონის შესრულების მიზნით, შესაბამისმა კომპეტენტურმა დაწესებულებებმა, ადმინისტრირების საკითხების დაზუსტების მიზნით, საჭიროების შემთხვევაში, შეიმუშაონ და გამოსცენ შესაბამისი სამართლებრივი აქტები.“.

11. კანონს დაემატოს შემდეგი შინაარსის 12¹ მუხლი:

„მუხლი 12¹. გარდამავალი დებულებანი

1. 2017 წლის 1 ივლისამდე ამ კანონის მე-9 მუხლის პირველი პუნქტის „ა“ ქვეპუნქტით განსაზღვრული დაწესებულებებიდან სასტუმროებში და სხვა მსგავს დაწესებულებაში თამბაქოს მოწვევა აკრძალულია სასტუმროს ნომრების არანაკლებ 50 პროცენტში.

2. 2017 წლის 1 ივლისამდე ამ კანონის მე-9 მუხლის პირველი პუნქტის „ა“ ქვეპუნქტით განსაზღვრული დაწესებულებებიდან საჯარო დაწესებულებების, კაფე-ბარების, რესტორნებისა და საზოგადოებრივი კვების ობიექტების, კაზინოების, სილამაზის სალონების, მაღაზიების და სავაჭრო ობიექტების შენობა-ნაგებობებში დასაშვებია როგორც მოწვევის სრული აკრძალვა ისე სპეციალური მოსაწევი ადგილი (ადგილები) გამოყოფა, რომელიც უნდა აკმაყოფილებდეს შემდეგ კრიტერიუმებს:

ა) არ უნდა იკავებდეს დაწესებულების საერთო ფართის 20%-ზე მეტს;

ბ) სრულად (კედლებით) გამიჯნული უნდა იყოს დაწესებულების სხვა ნაწილებისაგან/ტერიტორიისაგან;

გ) ჰქონდეს ვენტილაცია ან ღია სივრცეში გამავალი ფანჯარა.

3. 2018 წლის 1 იანვრამდე ამ კანონის მე-9 მუხლის პირველი პუნქტის „ა“ ქვეპუნქტით განსაზღვრული დაწესებულებებიდან კერძო ოფისების, ქარხანა-ფაბრიკების, საამქროების, საწყობების, ტერმინალების და სხვა მსგავსი დაწესებულებების შენობა-ნაგებობაში დასაშვებია როგორც მოწვევის სრული აკრძალვა ისე სპეციალური მოსაწვევი ადგილი (ადგილები) გამოყოფა, რომელიც უნდა აკმაყოფილებდეს შემდეგ კრიტერიუმებს:

ა) არ უნდა იკავებდეს დაწესებულების საერთო ფართის 20%-ზე მეტს;

ბ) სრულად (კედლებით) გამიჯნული უნდა იყოს დაწესებულების სხვა ნაწილებისაგან/ტერიტორიისაგან;

გ) ჰქონდეს ვენტილაცია ან ღია სივრცეში გამავალი ფანჯარა.

4. 2018 წლის 1 იანვრამდე ამ კანონის მე-9 მუხლის პირველი პუნქტის „ბ“ ქვეპუნქტით განსაზღვრული ტრანსპორტიდან არასამარშრუტო ტაქსებში, მფლობელებს შეუძლიათ როგორც მოწვევის სრული აკრძალვა, ისე მისი დაშვება.

5. 2018 წლის 1 იანვრამდე ამ კანონის მე-9 მუხლის პირველი პუნქტის „ვ“ ქვეპუნქტში მითითებული სტადიონების ხელმძღვანელებს შეუძლიათ როგორც მოწვევის სრული აკრძალვა, ისე მისი დაშვება დაწესებულების ტერიტორიის არაუმეტეს 50%-ისა.“.

მუხლი 2.

1. ეს კანონი, გარდა ამ მუხლის მე-2-6 პუნქტებით გათვალისწინებული ნორმებისა, ამოქმედდეს გამოქვეყნებისთანავე.

2. ამ კანონის პირველი მუხლის მე-5 პუნქტით გათვალისწინებული მე-6 მუხლი ამოქმედდეს 2017 წლის 1 ივლისიდან.

3. ამ კანონის პირველი მუხლის მე-9 პუნქტის „ა“ ქვეპუნქტით გათვალისწინებული მე-10 მუხლის პირველი პუნქტის „ა“ ქვეპუნქტი, ამ ქვეპუნქტით გათვალისწინებული დაწესებულებებიდან სასტუმროებში და სხვა მსგავს დაწესებულებებში ამოქმედდეს 2017 წლის 1 ივლისიდან.

4. ამ კანონის პირველი მუხლის მე-9 პუნქტის „ა“ ქვეპუნქტით გათვალისწინებული მე-10 მუხლის პირველი პუნქტის „ა“ ქვეპუნქტი, ამ ქვეპუნქტით გათვალისწინებული დაწესებულებებიდან საჯარო დაწესებულებების, კაფე-ბარების, რესტორნების, საზოგადოებრივი კვების ობიექტების, კაზინოების, სილამაზის სალონების, მაღაზიების და სავაჭრო ობიექტებისთვის ამოქმედდეს 2017 წლის 1 ივლისიდან.

5. ამ კანონის პირველი მუხლის მე-9 პუნქტის „ა“ ქვეპუნქტით გათვალისწინებული მე-10 მუხლის პირველი პუნქტის „ა“ ქვეპუნქტი, ამ ქვეპუნქტით გათვალისწინებული დაწესებულებებიდან კერძო ოფისების, ქარხანა-ფაბრიკების, საამქროების, საწყობების, ტერმინალების და სხვა მსგავსი დაწესებულებებისთვის ამოქმედდეს 2018 წლის 1 იანვრიდან.

6. ამ კანონის პირველი მუხლის მე-9 პუნქტის „ა“ ქვეპუნქტით გათვალისწინებული მე-10 მუხლის პირველი პუნქტის „ბ“ ქვეპუნქტი, ამ ქვეპუნქტით გათვალისწინებული

ტრანსპორტიდან არასამარშრუტო ტაქსებისთვის, აგრეთვე „ვ“ ქვეპუნქტი ამოქმედდეს 2018 წლის 1 იანვრიდან.

საქართველოს პრეზიდენტი

გიორგი მარგველაშვილი